

मार्निंग डोगरी न्यूज़ बुलेटिन, समें. 09-20 Hrs



Headlines

- प्रधानमंत्री नरेन्द्र मोदी होरें अपने आस्ट्रिया दौरे गी ऐतिहासक ते बड़ा उत्पादक करार दित्ता ऐ। उनें आखेआ ऐ जे इस दौरे नै दौनें मुख्यें बश्कार दोस्ती गी होर तगड़ा बनाया ऐ।
- कठुआ च फौजी जवानें पर घात लाइयै हमला करने आले आतंकवादिणं दे सफाये लेई बड्डे स्तर पर तपाशी अभियान जारी ऐ। 20एं शा मते लोकें गी पुच्छ-गिच्छ लेई हिरासत च लैता गेआ ऐ।
- जम्मू आधार शिविर थमां 4 जहार 885 श्रद्धालुएं दा जत्था श्री अमरनाथ जी दी यात्रा लेई अज्ज सख्त सुरक्षा बंदोबस्तें हेठ कश्मीर घाटी लेई रवाना होआ ऐ।
- गैर कनूनी प्रवास दे मामलें कन्ने निबडने लेई जम्मू कश्मीर दी सरकारै गैर कनूनी तौर पर इत्थें आए दे विदेशी नागरिकें दी शिनाख्त करने ते उनेंगी उंदे मुख्य वापस भेजने लेई इक पैनल कायम कीता ऐ।



PM Modi Austria

प्रधानमंत्री नरेन्द्र मोदी होरें अपनी आस्ट्रिया यात्रा गी ऐतिहासक ते बड़ा मता लाहकारी दस्सेआ। उनें आखेआ जे इस यात्रा कन्ने दवै मुख्यें बश्कार दोस्ती आले सरबंध होर मजबूत होए न। आस्ट्रिया दी अपनी यात्रा गी सम्पन्न करने पर मोदी होरें आखेआ जे ओह वियाना च बक्ख-बक्ख कार्यक्रमें च हिस्सा लैने मगरा बड़े खुश न। उनें आस्ट्रिया दे लोकें दी मेहमानबाजी ते प्यार आस्तै चांसलर कार्ल मेहमर ते आस्ट्रिया दी सरकार दा आभार जताया। वियाना च आस्ट्रिया दे चांसलर मेहमर हुंदे कन्ने गल्लबात मगरा प्रधानमंत्री मोदी होरें आखेआ जे भारत दे आस्ट्रिया नै अपने दपक्खी सरबंधें गी इक रणनीतिक दिशा देने सरबंधी फैसले लैते न।

आस्ट्रिया दे चांसलर कन्नै इक सांझी ब्यानै च मोदी होरें आखेआ जे उनें पच्छम एशिया दी स्थिति जां पही यूक्रेन दे संघर्ष सनें दुनिया दी मजूदा भू-राजनीतिक स्थिति पर विस्तार कन्नै चर्चा बी कीतीं प्रधानमंत्री होरें आखेआ जे भारत ते आस्ट्रिया बुनियादी ढांचे दे विकास, नमिणं काहडें, परती परतियै बरतोई सकने आली ऊर्जा, हाईड्रोजन, जल ते कचरा प्रबंधन, आर्टिफिशल इंटेलीजेंस ते क्वान्टम टैक्नालोजी जनेह् क्षेत्र च रलियै कम्म करगंन। एह्दे आस्तै औने आले दहाकें च सैहयोग दी इक रूपरेखा तैआर कीती गई ऐ।

<><><><><><>

Kathua Operation

कठुआ आतंकी हमले, जेह्दे च 5 सैनिक शहीद होइ गे हे, च शामिल आतंकवादिएं दा पता लाने लेई जारी तुपाई अभियान अज्ज उपरोतली चौथे रोज बी जारी ऐ। इस सिलसिले च 20 लोकें गी हिरासतै च बी लैता गेआ ऐ। जारी भारी बरखें ते घनी धुधे दे बावजूद बी कठुआ, भद्रवाह ते उधमपुर दे जंगलें च व्यापक तुपाई अभियान जारी ऐ। तुपाई इस सिलसिले च किश लोकें कोला पुच्छ-गिच्छ बी कीती जा'रदी ऐ। पुलस, फौज ते नीम फौजी बलें दियां सांझियां टीमां आतंकी हमले आली थाहर ते आले दोआले आले इलाकें गी खरी चाल्ली खंगाला करदियां न। घनें जंगलें कन्नै घिरे दा एह् इलाका बड़ा मता कठिन ऐ जेह्दे बावजूद बी तुपाई अभियान बरोबर जारी ऐ। तां जे इस खतरनाक हमले दे दोषी आतंकवादिएं गी फगडियै उंदे अंजाम तगर पजाया जाई सकै। तोआई उधमपुर, सांबा, राजौरी ते पुंछ जिले दे जंगली इलाकें च बी सुरक्षा बल भेजे गे न। सांबा जिले दे लाला चक्क, राजौरी दे मजांकोट इलाके ते पुंछ जिले दे सुरनकोट च बुधवार बडलै थमां नमें सिरिया तुपाई अभियान रंभे गेदे। होर ब्यौरे गी बलगेआ जा'रदा ऐ।

<><><><><><>

Solidarity March

पुछ जिले दे झल्लास सलोत्री इलाके दे लोकें कठुआ जिले च आतंकी हमले च शहीद होए दे सैनिकें गी श्रद्धांजलि देने लेई उंदे सम्मान च कल इक कैडल मार्च कड्डी। मकामी बसनीकें आस्सेआ आयोजित इस मार्च च लोकें हत्थें च मोमबतियां फगडियै मार्च कीता ते शहीदें गी नमन कीता, जेह्डे अपनी ड्यूटी दरान वीर गति गी प्राप्त होए। झल्लास सलोत्री जिले च बन्ने कन्ने लगदा खीरला ग्रां ऐ। इक मकामी बसनीक "अमन डाबर" नै आखेआ जे एह् मार्च शहीदें प्रति सम्मान प्रगट करने ते भारतीय फौज कन्नैइक जुटता दर्शाने लेई कड्डी गई। इक साबका टीचर राज कुमार नै साढे संवाददाता अनुभव मिसरी कन्नै गल्ल करदे होई आखेआ.....

<><><><><><>

Encounter

उधमपुर जिले च बसंतगढ़ तैहसील हेठ पौंदी संग पुलस चौकी च एल्लै सुरक्षाबलें ते आतंकवादिएं बश्कार टाकरा चलै करदा ऐ। एह जानकारी एसएसपी जोगिंदर सिंह हुंदे हवाले कन्नै आई ऐ। तोआई मकामी मीडिया दिएं खबरें मूजब जंदी रातीं कोई 8 क बजे आतंकवादिएं इस पुलस चौकी पर हमला कीता जेहदे परेंत इलाके गी घेरियै इक व्यापक तुपाई अभियान शुरू कीत गोआ। इस इलाके दे कन्नै लगदिएं सुरक्षा चौकिएं पर बी बाद्धू बल भेजे गे न। होर ब्यौरे गी बलगेआ जा'रदा ऐ।

<><><><><><>

SC Verdict

बीजेपी नै सुप्रीम कोर्ट आस्सेआ मुस्लिम महिलाएं गी पति थमां गुजारा भत्ता हासल करने दा अधिकार दित्ते जाने आले फैसले दा सुआगत कीता ऐ। नमीं दिल्ली च मीडिया दे सुआलें दा परता दिंदे होई पार्टी दे प्रवक्ता सुधांशु त्रिवेदी होरें इस फैसले गी मुस्लिम महिलाएं आस्तै बड्डी राहत आला करार दित्ता। उनें गलाया जे इस फैसले कन्नै महिलाएं गी बरोबर सम्मान थहोग। 1985 आले शाह बानो मामले दा हवाला दिंदे होई उनें कथित तौर पर दोष लाया जे कांग्रेस पार्टी नै संविधान पर केई चाल्ली नुकसान पजाने दी कोशश कीती। उनें गलाया जे 39 ब'रें मगरा इस फैसले नै महिलाएं गी राहत दित्ती ते उनेंगी उंदा हक्क दोआया।

<><><><><><>

Amarnath Yatra

जम्मू थमां अज्ज बडलै श्री अमरनाथ यात्रिं दा 14मां जत्था कश्मीर घाटी लेई रवाना होआ। लौहकिं बडिडं कुल 191 गडिडं दे काफले च सोआर इनें 4 ज्हार 885 श्रद्धालुं च 3 ज्हार 622 मर्द, 1 ज्हार 86 महिला, 14 न्याणे, 111 साधु ते 52 साध्वियां शामिल न जेहडे बम बम भोले दे जयकारे लांदे कश्मीर घाटी लेई रवाना होए। इस जत्थे चा 2 ज्हार 991 यात्रु पहलगाम ते 1 ज्हार 894 बालटाल बेस कैंप लेई रवाना होए, जित्थूं अग्गे ओह पवित्र गुफा लेई अपनी यात्रा शुरू करगंन।

<><><><><><>

Foreign Nationals

जम्मू कश्मीर च पिछले 13 ब'रें थमां गैर कनूनी तौर पर रवा'रदे विदेशी नागरिकें दा पता लाने लेई 7 मिंबरी पैनल दा गठन कीता गोआ ऐ। इस जतन दा मकसद इनें लोकें गी वापस भेजने ते गैर कनूनी तौर पर इत्थें आइयै रवा'रदे लोकें दे मसले दा हल करना ऐ।

2011 थमां जेहूँडे विदेशी नागरिक इत्थें गैर कनूनी तौर पर रवा'रदे न, उंदा पता लाया जाग। गृह मैहकमे दे प्रधान सचिव होरें इस सरबंघै च आदेश जारी कीता ऐ। इस कमेटी दी मुख्ज जिम्मेदारी गैर कनूनी तौर रवा'रदे विदेशी नागरिकें दी बायोग्राफिक ते बायोमैट्रिक सरबंघी जानकारी किट्ठी करने ते डिजीटल रिकार्ड गी ताजा तरीन करने दी होग। इस पैनल गी इनें नागरिकें गी तुप्पने, उनेंगी पंछान नै ते वापस भेजने सरबंघी कम्में कारवाइएँ दी जिम्मेदारी दित्ती गई ऐ।

<><><><><><><>

Principal Secretary

राई-बाई दी पैदावार सरबंघी मैहकमे दे प्रधान सचिव शैलेन्दर कुमार होरें इक बैठक लाइयै मैहकमे आस्सेआ चलाए जा'रदे विकास प्रोजेक्टें तैह्त हासल प्रगति दा जायजा लैता। बैठक दरान मुख्ज करी ध्यान राई-बाई दे पूरे पराते विकास सरबंघी प्रोग्राम, कैपेक्स, केन्द्र प्रायोजित स्कीमें ते प्रोजेक्ट सरबंघी व्यापक रिपोर्ट पर ते अजें तगर हासल ढोस ते माली प्रगति पर दित्ता गेआ। उनें अफसरें पर जोर पाया जे ओह तैह लक्ष्येंगी समें सि हासल करने लेई कम्म करन। उनें उपलब्ध संसाधनें दा बेहतर ते कारगर ढंगै सिर इस्तेमाल पर जोर पाया। प्रधान सचिव होरें सब्बने सरबंघी घड़ें गी आखेआ जे ओह आपू'चै नेडमा तालमेल बनाइयै कम्म करन, तां जे कम्म मित्थे गेदे समें सिर पूरा होई सकै।

<><><><><><><>

Secretary Health

सेहत ते मैडिकल शिक्षा मैहकमे दे सचिव डॉ. सईद आबिद रशीद शाह होरें कल सिविल सचिवालय च इक बैठक दी अध्यक्षता करदे होई जम्मू कश्मीर दे बक्ख-बक्ख हिस्से च PM-ABHIM ते ECRP-II तैह्त मंजूर परियोजनाएं दी प्रगति ते रफ्तार दा जायजा लैता। इस मौके सेहत सचिव होरें आखेआ जे PM-ABHIM ते ECRP-II केन्द्र आस्सेआ प्रायोजित मती तरजीह आलियां दऊं महत्वपूर्ण स्कीमां न। उनें इनें परियोजनाएं बेल्ले सिर मुकम्मल होने दे महत्वै पर लोह पांदे होई हर प्रोजेक्ट बारे बक्खरी बक्खरी तफसीली रिपोर्ट मंगी ते कम्में गी तोड़ चाढ़ा'रदी अजेंसिएं गी आखेआ जे इनेंगी समें सिर तोड़ चाढ़ना जकीनी बनाने लेई कम्में दी रफ्तार च तेजी आंदी जा। उनें सुविधा उपलब्ध कराने आले ते कम्में गी तोड़ चाढ़ने आलिएं अजेंसिएं बश्कार नेडमे तालमेल ते हर कम्मै पर सख्त निगरानी पर जोर दित्ता।

<><><><><><><>

DC Jammu

जम्मू दे डिप्टी कमीशनर सचिन कुमार वैश्य होरें समवान ब्लाक मुख्यालय च लोक दरबार लाया ते मकामी लोकें दिएं समस्याएं गी सुनेआ ते इनें मसलें दे समें सिर हल दा भरोसा दोआया। इस दरान खरी मती गिनतरी च लोक मजूद हे, जिनें केई सारे मामलें गी पुट्टेआ, जेहूदे च शिड़कां, राजस्व सरबंधी सेवा, हाडें थमां बचाह ते मिट्टी दे रूड़ने गी बचाने लेई हीलें शामिल हे। कार्यक्रम दी अध्यक्षता करदे होई डिप्टी कमीशनर होरें लोकें गी भरोसा दोआया। डिप्टी कमीशनर होरें खौड़ ब्लाक दा दौरा लाया ते पीएसजीए तैहत सेवाएं दे म्यार ते सेवाएं दी उपलब्धता दा बी जायजा लैता।

<><><><><><>

DC Udhampur

उधमपुर दिएं जिला विकास कमीशनर सलोनी राय होरें हफतावार ब्लाक दिवस सिलसिले च कल कल्लर ब्लाक मुख्यालय च इक कैंप दा सरिस्ता कीता जेहूदे च आम लोकें ते पंचैत प्रतिनिधिएं अपने केई मुद्दें, मसलें ते शकैता पुट्टियां। जिंदे च ग्राम रक्षा गार्डें दी भर्ती, बिजली दे त्रोडे, बट्टल बल्लिया दोमेल सड़कें दी मरम्मत ते रख-रखाव, बच्चें दे खेडने लेई मनोरंजन पार्क बनाना, सोलर लाइटां लाना, खराब सड़कें दी मरम्मत, अप्पर मल्हार च बिजली दा ट्रांसफार्मर लाना, एमजी-नरेगा तैहत बकाया देन7दारिएं दा निबटारा ते इस चाल्ली दे केई मुद्दें शामिल हे। कैंप च मजूद बक्ख-बक्ख मैहकमें दे माहिरें लोकें गी सरकारी स्कीमें दा लाह ठोआने लेई अग्गे औने लेई आखेआ। लोकें दिएं मंगें गी धरोइयै सुनने दे बाद डीसी होरें उंदे सब्बने जायज मामलें दा पैहल दी बिनाह पर नबेड़ा करने दा जकीन दोआया।

<><><><><><>

Block Diwas Rajouri

राजौरी दे जिला विकास आयुक्त ओ.पी.भगत होरें थन्नामंडी च लोकें तगर पुज्ज बनाने लेई ब्लाक दिवस प्रोग्राम तैहत शिविर च हिस्सा लैता। उनें सरकारी सेवाएं च पारदर्शी, जवाबदेही ते लोकें दे घरें दे कोलकाल सेवा उपलब्ध करोआने लेई प्रशासन दी वचनबद्धता जाहर कीती। शिविर दरान लोकें ते उंदे नुमायंदे आस्सेआ बक्ख-बक्ख मामलें गी पुट्टेआ गेआ। डिप्टी कमीशनर होरें लोकें दे मसलें गी ध्यानै नै सुनेआ ते लोकें गी भरोसा दोआया जे उंदे जायज मसलें दा समें बद्ध ढंगै सिर पक्क गै हल कीता जाग।

श्री भगत होरें लोकें गी बक्ख—बक्ख सरकारी स्कीमें ते प्रोग्रामें बारे दस्सने ते उनेंगी अग्गे आइयै इनें स्कीमें थमां लाह ठोआने लेई गलाया।

<><><><><><>

Gold Smuggling

भारत तिब्बत बार्डर पुलस आईटीबीपी नै पूर्वी लद्दाख च सिरीगैपल इलाके थमां सुन्ने दे किलो—किलो दे 108 इट्टां बरामद कीतियां न। आईटीबीपी नै अपने इक सोशल मीडिया पोस्ट राएं जानकारी दित्ती ऐ जे बल दी 21मीं बटालियन दे डिप्टी मकांडेंट दीपक भट्ट हुंदी अगुवाई च गश्त करा'रदी टीम नै इस सिलसिले च दऊं संदिग्धें गी फगड़ेआ ऐ ते पुच्छ—गिच्छ जारी ऐ।

<><><><><><>